

欽定明史

卷十三之二十四

欽定明史

卷一百一十五

列傳

明史卷十三

本紀第十三

總裁官總理事務經筵講官少保兼太子太保保和殿大學士兼管吏部戶部尙書事加六級張廷玉等奉
敕修

憲宗一

憲宗繼天凝道誠明仁敬崇文肅武宏德聖孝純皇帝諱見深英宗長子也母貴妃周氏初名見濬英宗
留瓦剌皇太后命立爲皇太子景泰三年廢爲沂王天順元年復立爲皇太子改名見深天順八年正月
英宗崩乙亥卽皇帝位以明年爲成化元年大赦天下免明年田租三之一浙江江西福建陝西臨清鎮
守內外官諸邊鎮守內官正統間所無者悉罷之下番使者緝事官校皆召還二月庚子始以內批授官
三月甲寅朔尊皇后爲慈懿皇太后貴妃周氏爲皇太后戊午放宮人丙寅毀錦衣衛新獄庚午賜彭教
等進士及第出身有差癸酉詔內閣九卿考覈天下方面官戊寅復立團營夏四月癸未朔日當食不見
五月丁巳大風雨雹敕羣臣修省庚申葬睿皇帝於裕陵秋七月壬申立吳氏爲皇后八月癸未御經筵
甲申命儒臣日講癸卯廢皇后吳氏下太監牛玉於獄冬十月壬辰立王氏爲皇后甲辰立武舉法十二
月甲辰免京官雜犯罪是年兩畿川廣荆襄盜賊大起道路不通安南烏斯藏入貢

成化元年春正月乙卯享太廟己未大祀天地於南郊甲子都督同知趙輔爲征夷將軍充總兵官僉都御史韓雍贊理軍務討廣西叛獠二月戊子祭社稷甲午耕藉田三月庚戌四川山都掌蠻亂丁巳釋奠於先師孔子夏五月辛酉大雨雹壬戌避正殿減膳敕羣臣修省秋七月己酉免天下軍衛屯糧十之三甲子振兩畿浙江河南饑八月丁丑工部侍郎沈義僉都御史吳琛振撫兩畿饑民辛巳瘞暴骸庚寅毛里孩犯延綏總兵官房能敗之冬十二月癸卯撫寧伯朱永爲靖虜將軍充總兵官大監唐慎監軍工部尙書白圭提督軍務討荆襄賊是月韓雍大破大藤峽獠改名峽曰斷藤是年琉球哈密瓜哇烏斯藏入貢

二年春正月戊申罷團營乙卯大祀天地於南郊辛酉英宗神主祔太廟二月癸未禮部侍郎鄒幹巡視畿內饑民三月甲辰賜羅倫等進士及第出身有差己酉李賢父卒乞終制不許乙卯朱永大破荆襄賊劉通於南漳閏月癸酉振南畿饑乙未朱永擊擒劉通其黨石龍遁轉掠四川夏五月癸酉修撰羅倫以論李賢起復謫福建市舶司提舉己卯禁侵損古帝王忠臣烈士名賢陵墓六月甲辰趙輔師還乙巳免今年天下屯糧十之三壬子楊信爲平虜將軍充總兵官太監裴富監督軍務禦寇延綏秋七月辛巳封弟見治爲忻王見楠徽王戊戌毛里孩犯固原八月丁巳犯寧夏都指揮焦政戰死丁卯諭祭于謙復其

子冕官冬十月丁未朱永鑒擒石龍賊平進永爲侯十二月甲寅李賢卒丙辰太常寺少卿兼翰林院侍讀學士劉定之入閣預機務是月斷藤峽賊復起是年哈密琉球安南烏斯藏瓦剌入貢

三年春正月己卯大祀天地於南郊丙申撫寧侯朱永爲平胡將軍充總兵官會楊信討毛里孩二月丁酉朔日有食之丁巳湖廣總兵官李震討破靖州苗三月戊辰召商輅爲兵部侍郎復入閣己巳毛里孩犯大同辛巳復開浙江福建四川雲南銀場以內臣領之夏四月四川地震震自去年六月至於是月乙巳錄囚癸丑復立團營六月戊申雷震南京午門敕羣臣修省辛酉襄城伯李瑾爲征夷將軍充總兵官兵部尙書程信提督軍務太監劉恆監軍討山都掌蠻秋七月乙酉停河南採辦九月辛未振湖廣江西饑十二月庚子左庶子黎淳追論景泰廢立事帝曰景泰事已往朕不介意且非臣下所當言切責之辛丑杖編修章懋黃仲昭檢討莊景謫官有差是月程信破山都掌蠻平之是年琉球哈密占城烏斯藏入貢朝鮮獻海青白鵲諭毋獻

四年春正月甲戌大祀天地於南郊三月甲子免湖廣被災秋糧甲申詔中外勢家毋得擅請田土夏四月丁巳錄囚陳文卒五月癸未遣使錄天下囚六月丙午免江西被災秋糧辛亥開城賊滿俊反陝西總兵官寧遠伯任壽巡撫都御史陳价討之甲寅慈懿皇太后崩秋七月癸酉都督同知劉玉爲平虜副將

軍充總兵官太監劉祥監軍副都御史項忠總督軍務討滿俊八月癸巳京師地震乙卯朱永代劉玉爲總兵官是月任壽陳价寧夏總兵官廣義伯吳琮及滿俊戰敗績都指揮蔣泰申澄被殺九月庚申葬孝莊睿皇后於裕陵辛酉振陝西饑壬申以地震星變下詔自責敕羣臣修省甲申給事中董曼御史胡深等九人請罷商輅及禮部尙書姚夔下獄杖之冬十月乙未項忠敗賊於石城伏羌伯毛忠戰死十一月項忠擊擒滿俊送京師伏誅壬戌毛里孩犯遼東指揮胡珍戰沒十二月己酉遼東總兵官趙勝奏十一月初六日虜賊千餘攻指揮傅斌營指揮胡珍率軍來援被賊射死毛里孩犯延綏都指揮僉事許寧擊敗之是年琉球烏斯藏哈密日本滿刺加入貢

五年春正月乙丑大祀天地於南郊三月辛丑賜張昇等進士及第出身有差夏五月辛丑禮部侍郎萬安兼翰林院學士入閣預機務六月癸丑朔日有食之辛酉錄囚秋八月辛酉劉定之卒冬十一月乙未毛里孩犯延綏是年冬阿羅出入居河套琉球哈密烏斯藏滿刺加安南土魯番入貢

六年春正月己丑大祀天地於南郊己亥大同總兵官楊信敗毛里孩於胡柴溝二月辛未大理寺少卿宋曼侍郎曾鞏原傑黃琛副都御史滕昭巡視畿南浙江河南四川福建考察官吏訪軍民疾苦其餘直省有巡撫等官者命亦如之丁丑禱雨於郊壇戊寅振廣西饑三月甲申免湖廣山東被災稅糧壬寅詔

延綏屯田朱永爲平虜將軍充總兵官太監傅恭顧恆監軍王越參贊軍務備阿羅出於延綏夏五月丙申振畿內山東河南饑丁酉王越敗阿羅出於延綏東路六月戊申朔日有食之秋七月壬午朱永敗阿羅出於雙山堡丙戌都御史項忠侍郎葉盛振畿輔饑民都督李景撫治屯營甲辰總兵官房能敗阿羅出於開荒川是月免南畿四川被災稅糧八月辛亥振山西饑癸丑以水旱相仍下詔寬卹冬十月免畿內河南山東被災稅糧十一月癸未荆襄流民作亂項忠總督河南湖廣荆襄軍務討之是月李羅忽渡河與阿羅出合十二月庚戌遣使十四人分振畿輔是年琉球哈密烏斯藏入貢

七年春正月辛巳命京官五品以上及給事中御史各舉堪州縣者一人丙戌大祀天地於南郊夏四月己巳錄囚五月辛巳瘞京師暴骸秋八月甲辰振山東浙江水災閏九月己未浙江潮溢漂民居鹽場遣工部侍郎李顯往祭海神修築隄岸冬十月乙亥王恕爲刑部侍郎總理河道十一月甲寅立皇子祐極爲皇太子大赦己未荆襄賊平流民復業者一百四十餘萬人十二月甲戌彗星見下詔自責敕羣臣修省條時政得失壬午彗星入紫微垣避正殿撤樂御奉天門聽政癸未召朱永還王越總督延綏軍務辛卯減死罪以下是年卽加思蘭入居河套與阿羅出合安南黎灝攻占城破之琉球安南入貢

八年春正月庚戌大祀天地於南郊癸亥皇太子薨是月延綏參將錢亮禦毛里孩於安邊營敗績都指

揮柏隆陳英戰死卽加思蘭犯固原平涼三月癸丑賜吳寬等進士及第出身有差夏四月京師久旱運河水涸癸酉遣使禱於郊社山川淮瀆東海之神乙酉錄囚丁亥遣使錄天下囚五月癸丑武靖侯趙輔爲平虜將軍充總兵官節制各邊軍馬同王越禦卽加思蘭秋九月丙午諭安南黎灝還占城侵地冬十一月己酉監晉伯劉聚代趙輔爲將軍屯延綏十二月癸酉振京師饑民是年孛羅忽卽加思蘭屢入安邊營花馬池犯固原監夏平涼臨鞏環慶南至通渭琉球哈密安南入貢

九年春正月丁未大祀天地於南郊壬子劉聚王越敗卽加思蘭於漫天嶺是月土魯番速檀阿力破哈密據之夏四月辛酉朔日有食之甲子福餘三衛寇遼東總兵官歐信擊敗之戊辰盡免山東稅糧瘞京畿暴骸壬午閏武臣騎射於西苑秋七月壬辰巡撫延綏都御史余子俊敗卽加思蘭於榆林澗九月辛卯鎮守浙江中官李義杖殺監波衛指揮馬璋詔勿問庚子王越襲滿都魯孛羅忽卽加思蘭於紅鹽池大破之諸部漸出河套冬十一月丁酉復閏騎射於西苑是年免湖廣畿內山西西南畿陝西被災稅糧振畿內陝西饑振山西者再山東者三哈密琉球暹羅入貢

十年春正月丁亥朔振京師貧民丁酉大祀天地於南郊癸卯王越總制延綏甘肅監夏三邊駐固原丙午召劉聚還三月免南畿湖廣被災秋糧夏五月戊申申藏妖書之禁是月免山西陝西被災秋糧閏六

月乙巳築邊牆自紫城砦至花馬池秋七月甲寅免江西被災秋糧八月辛卯都督同知趙勝爲平虜將軍充總兵官太監劉恆覃平監軍討卽加思蘭九月癸丑朔日有食之乙卯免南畿水災秋糧冬十一月丙子免河南被災稅糧十二月己丑罷寶慶諸府採金甲午錄妖書名示天下是年琉球烏斯藏土魯番入貢

十一年春正月癸亥大祀天地於南郊二月甲申禁酷刑三月壬子賜謝遷等進士及第出身有差辛未彭時卒夏四月乙酉吏部侍郎劉翊禮部侍郎劉吉並兼翰林學士入閣預機務壬辰乾清門災己亥錄囚五月癸酉免湖廣被災秋糧秋八月辛巳浚通惠河丁亥滿都魯卽加思蘭遣使來朝九月丁未朔日有食之冬十一月癸丑立皇子祐樞爲皇太子大赦十二月戊子復郕王帝號丁酉申自宮之禁是年土魯番琉球暹羅滿刺加安南入貢命琉球貢使二年一至

明史卷十三終

明史卷十四

本紀第十四

敕修

總裁官總理事務經筵講官少保兼太子太保保和殿大學士兼管吏部戶部尚書事加大級張廷玉等奉

憲宗二

十二年春正月辛亥南京地震有聲戊午大祀天地於南郊二月乙亥朔日有食之甲午敕羣臣修省三月壬子減內府供用物壬戌李震大破靖州苗夏五月丁卯副都御史原傑撫治荆襄流民庚申錄囚秋七月庚戌黑酋見乙丑躬禱天地於禁中以用度不節工役勞民忠言不聞仁政不施四事自責戊辰遣使錄天下囚冬十月辛巳京師地震十一月巡撫四川都御史張瓚討灣溪苗破之十二月己丑置鄖陽府設行都司衛所處流民是年土魯番撒馬兒罕琉球烏斯藏入貢

十三年春正月庚戌大祀天地於南郊己巳置西廠太監汪直提督官校刺事夏四月汪直執郎中武清樂章太醫院院判蔣宗武行人張廷綱浙江布政使劉福下西廠獄五月甲戌執左通政方賢下西廠獄丙子大學士商輅尚書項忠請罷西廠從之六月甲辰罷項忠爲民庚戌復設西廠丁巳商輅致仕秋八月壬戌錦衣衛官校執工部尚書張文質繫獄帝知而釋之冬十月戊申復立哈密衛於苦峪谷給土田

牛種十一月張瓚破松潘疊溪苗是年免浙江山東河南江西福建被災稅糧振山東南畿州縣饑安南琉球烏斯藏暹羅日本入貢滿都魯訖加思蘭各遣使貢馬

十四年春正月甲戌大祀天地於南郊三月戊辰免浙江被災秋糧己卯賜曾彥等進士及第出身有差辛巳罷烏撒衛銀場丙戌復開遼東馬市丁亥以浙江饑罷採花木夏四月丁酉免南畿山東被災秋糧六月癸卯太監汪直行遼東邊秋七月丁丑遣使振畿南山東饑八月癸巳以直隸山東災傷詔六部條卹民事宜南京刑部侍郎金紳巡視江西水災庚戌免湖廣被災秋糧甲寅下巡撫蘇松副都御史牟倬於錦衣衛獄謫戌十二月甲午免畿內被災秋糧是年占城烏斯藏撒馬兒罕入貢

十五年春正月丁卯大祀天地於南郊辛巳振山東饑免秋糧二月免湖廣被災秋糧甲寅詔修開國勳臣墓無後者置守塚一人夏四月丙午免南畿被災稅糧壬子下駙馬都尉馬誠於錦衣衛獄五月壬戌汪直劾侍郎馬文升下文升獄謫戌癸酉以馬文升牟倬事杖給事中李俊御史王濬五十六人於闕下己卯免湖廣河南被災稅糧秋七月癸酉汪直行大同宣府邊冬十月丁亥撫寧侯朱永爲靖虜將軍充總兵官汪直監軍禦伏當加十二月辛未論功封朱永保國公加汪直歲祿陞賞者二千六百餘人是月免四川江西被災稅糧是年琉球安南烏斯藏入貢

十六年春正月甲午大祀天地於南郊丁酉保國公朱永爲平虜將軍充總兵官王越提督軍務汪直監軍禦亦思馬因於延綏二月癸酉免湖廣被災稅糧戊寅王越襲亦思馬因於威寧海子破之三月戊子以歲歉減光祿寺供用物夏六月癸丑禁勢家侵占民田秋八月辛酉申存卹孤老之令冬十二月庚申亦思馬因犯大同丙寅朱永汪直王越帥京軍禦之是月總督兩廣軍務都御史朱英總兵官平鄉伯陳政討廣西猺破之是年免兩畿湖廣河南山東雲南被災稅糧琉球暹羅蘇門答刺土魯番撒馬兒罕入貢

十七年春正月丙戌大祀天地於南郊二月壬戌覈天下庫藏出納之數是月免浙江山西被災稅糧三月辛卯賜王華等進士及第出身有差夏四月庚申以久旱風霾敕羣臣修省戊辰諭法司慎刑獄太監懷恩同法司錄囚自是每五歲遣內臣審錄以爲常癸酉亦思馬因犯宣府五月己亥汪直監督軍務王越爲平胡將軍充總兵官禦之秋七月甲戌免南畿被災秋糧甲午命所在鎮守總兵巡撫聽汪直王越節制冬十月壬戌振河南饑十一月戊子取太倉銀三分之一入內庫是年安南占城滿剌加烏斯藏入貢安南黎灝侵老撾宣慰司賜敕諭之

十八年春正月壬午大祀天地於南郊庚寅劉吉起復三月己巳朔振南畿饑壬申罷西廠夏四月癸丑

罕慎復哈密城甲子免山西被災夏稅五月免山東南畿被災稅糧六月壬寅亦思馬因犯延綏汪直王越調兵禦敗之秋八月癸丑遣使振畿內山東饑辛酉免河南被災稅糧閏月壬申倉副使應時用請罷饒州燒造御器內臣下獄贖還職冬十一月免畿內陝西遼東被災秋糧十二月庚午御製文華大訓成是年琉球哈密暹羅土魯番烏斯藏入貢

十九年春正月丙午大祀天地於南郊三月丙辰免湖廣被災稅糧夏四月丁丑免河南被災稅糧六月乙亥汪直有罪調南京御馬監丁丑陳政破廣西猺秋七月辛丑迤北小王子犯大同癸卯總兵官許寧禦之敗績己未朱永爲鎮朔大將軍充總兵官帥京軍禦之八月甲子犯宣府巡撫都御史秦紘總兵官周玉禦却之乙丑戶部侍郎李衍刑部侍郎何喬新巡視邊關壬申謫汪直爲奉御其黨王越戴縉等貶黜有差是月朱永敗寇於大同宣府冬十月壬申召朱永還是年撒馬兒罕貢獅子

二十年春正月庚寅京師地震壬辰敕羣臣修省詔減貢獻飭備邊罷營造理冤獄寬銀課工役馬價卹大同陣亡士卒丁酉大祀天地於南郊三月庚寅賜李旻等進士及第出身有差己酉太監張善監督軍務定西侯蔣琬充總兵官同總督尙書余子俊備大同宣府夏四月戊午錄囚五月甲午再錄囚減死罪以下六月免南畿陝西被災稅糧秋九月乙酉朔日有食之是月寇復入居河套是秋陝西山西大旱饑

人相食停歲辦物料免稅糧發帑轉粟開納米事例振之冬十月丁巳杖刑部員外郎林俊都督府經歷張黻並謫官癸酉罷雲南元江諸府銀坑十二月免山西河南被災夏稅是年安南日本琉球哈密土魯番入貢

二十一年春正月甲申朔星變丙戌詔羣臣極言時政庚寅赦天下乙未大祀天地於南郊乙巳遣侍郎李賢何喬新賈俊振陝西山西河南饑二月己未放免傳奉文武官五百六十餘人丁丑免陝西被災稅糧夏四月戊午以泰山屢震遣使祭告壬戌轉漕四十萬石振陝西饑是月免南畿山東被災稅糧五月壬戌京師地震丙子振京師饑民六月辛巳令武臣納粟襲職癸未詔盛暑祁寒廷臣所奏毋得過五事秋八月己卯朔日有食之九月甲子劉珣致仕冬十月免山東山西河南陝西四川被災稅糧十一月丙寅京師地震十二月甲申詹事彭華爲吏部左侍郎兼翰林學士入閣預機務甲午振南畿饑是冬小王子犯蘭州莊浪鎮番涼州是年哈密烏斯藏入貢

二十二年春正月己未大祀天地於南郊乙丑免河南被災秋糧二月庚辰免畿南及湖廣被災秋糧夏四月乙未清畿內勦賊莊田六月免南畿陝西被災稅糧乙亥敕羣臣修舉職業甲午諭法司慎刑秋七月小王子犯甘州指揮姚英等戰死九月免河南廣東被災稅糧丁卯兵部左侍郎尹直爲戶部侍郎兼

翰林學士入閣預機務冬十一月癸丑占城爲安南所侵王子古來來奔十二月免江西廣西被災稅糧是年哈密琉球入貢

二十三年春正月免陝西湖廣被災稅糧庚戌大祀天地於南郊二月乙酉副都御史邊鏞通政司參議田景賢巡視大同諸邊三月丁未彭華致仕丁巳賜費宏等進士及第出身有差癸亥免山東被災稅糧夏四月乙亥免浙江被災秋糧五月乙卯旱遣使分禱天下山川丙辰敕羣臣修省是月朶顏三衛避那孩入遼東令駐牧近邊給米布六月免陝西南畿被災秋糧秋七月戊申封皇子祐橈爲興王祐楹岐王祐檣益王祐樞衡王祐檠雍王八月庚辰帝不豫甲申皇太子攝事於文華殿己丑崩年四十有一九月乙卯上尊諡廟號憲宗葬茂陵

贊曰憲宗早正儲位中更多故而踐阼之後上景帝尊號卹于謙之冤抑黎瀄而召商輅恢恢有人君之度矣時際休明朝多耆彥帝能篤於任人謹於天戒蠲賦省刑閭里日益充足仁宣之治於斯復見顧以任用汪直西廠橫恣盜竊威柄稔惡弄兵夫明斷如帝而爲所蔽惑久而後覺婦寺之禍固可畏哉

明史卷十五

本紀第十五

總裁官總理事務經筵講官少保兼太子太保保和殿大學士兼管吏部戶部尚書事加六級張廷玉等奉

敕修

孝宗

孝宗達天明道純誠中正聖文神武至仁大德敬皇帝諱祐樞憲宗第三子也母淑妃紀氏成化六年七月生帝於西宮時萬貴妃專寵宮中莫敢言悼恭太子薨後憲宗始知之育周太后宮中十一年敕禮部命名大學士商輅等因以建儲請是年六月淑妃暴薨帝年六歲哀慕如成人十一月立爲皇太子二十三年八月憲宗崩九月壬寅卽皇帝位大赦天下以明年爲弘治元年丁未斥諸佞倖侍郎李孜省太監梁芳外戚萬喜及其黨謫戍有差冬十月丁卯汰傳奉官罷右通政任傑侍郎蒯綱等千餘人論罪戍斥革法王佛子國師真人封號乙亥尊皇太后周氏爲太皇太后皇后王氏爲皇太后丙子立妃張氏爲皇后丁亥萬安罷壬辰追諡母淑妃爲孝穆皇太后癸巳吏部左侍郎兼翰林學士徐溥入閣預機務十一月癸丑尹直罷乙卯詹事劉健爲禮部侍郎兼翰林學士入閣預機務戊午下梁芳李孜省於獄十二月壬午葬純皇帝於茂陵是月免江西湖廣被災稅糧是年安南暹羅哈密土魯番烏斯藏琉球入貢封占